



KEMENTERIAN WILAYAH PERSEKUTUAN
Blok 2, Menara Seri Wilayah, Presint 2, 62100 Putrajaya
Tel: 03-8889 7888 Faks: 03-8889 7957
Laman web: www.kwp.gov.my

SIARAN MEDIA

UNTUK LIPUTAN MEDIA MASSA

FESTIVAL HARI WILAYAH PERSEKUTUAN PUPUK SEMANGAT PERPADUAN DAN RASA SAYANG DALAM KALANGAN WARGA KOTA

KUALA LUMPUR, 1 Februari 2020 – Festival Hari Wilayah Persekutuan 2020 disempurnakan oleh YB Tuan Haji Khalid bin Abd. Samad, Menteri Wilayah Persekutuan pada malam ini. Sambutan Hari Wilayah Persekutuan 2020 ini membuka tirai dengan penganjuran semula Festival Hari Wilayah Persekutuan di Dataran Merdeka, Kuala Lumpur bersama-sama warga kota.

Kementerian Wilayah Persekutuan (KWP) melalui Dewan Bandaraya Kuala Lumpur (DBKL) menganjurkan Festival ini untuk memberi peluang kepada orang ramai bersama-sama berkumpul dan memeriahkan lagi sambutan Hari Wilayah Persekutuan 2020. Ini sebagai memperingati dan meraikan pengisytiharan Kuala Lumpur, Putrajaya dan juga Labuan sebagai Wilayah Persekutuan.

Tema **'Sayangi Wilayahku'** dikekalkan untuk memupuk semangat integrasi nasional dan kesejahteraan yang menjadi penggerak utama agenda memperkasakan perpaduan masyarakat selari dengan Wawasan Kemakmuran Bersama. Pengisian program yang berelemen perpaduan dan kesejahteraan adalah untuk menyemarakkan semangat, rasa sayang serta sokongan rakyat Wilayah Persekutuan terhadap inisiatif Kerajaan.

Festival Hari Wilayah Persekutuan ini turut memanfaatkan kemudahan dan kepakaran profesional sedia ada dalam agensi-agensinya di bawah KWP. Pasukan orkestra DBKL diketengahkan dalam membuat persembahan khas lagu-lagu patriotik kepada warga kota. Persembahan oleh pasukan orkestra DBKL ini bakal diteruskan di lapan (8) lokasi awam serta di Projek Perumahan Rakyat (PPR) dan Perumahan Awam (PA) dalam mendidik warga kota khususnya golongan belia mencintai seni budaya warisan bangsa. Ini sekaligus menyemai semangat cinta kepada negara melalui lagu-lagu patriotik yang patut dihayati secara bersama.

Aktiviti sepanjang Festival Hari Wilayah Persekutuan dua hari ini juga dilaksanakan berpandu kepada aspek pembangunan rakyat yang memberi manfaat dari sektor ekonomi, sukan dan sebagainya. Penganjuran Festival Hari Wilayah Persekutuan akan dibuat secara sistem penggiliran di Wilayah Persekutuan Putrajaya dan juga Labuan pada tahun-tahun berikutnya.

Selain daripada festival ini, sebanyak 29 lagi program mengikut lima kluster utama yang melibatkan semua lapisan masyarakat diadakan dari 1 Februari sehingga 29 Februari 2020 di Wilayah Persekutuan Kuala Lumpur, Putrajaya dan Labuan. Penglibatan seluruh warga Wilayah Persekutuan dalam program-program ini adalah satu peluang keemasan yang wajar diambil dalam melahirkan warga kota yang lebih prihatin, harmoni dan sejahtera.

**Disediakan Oleh:
Bahagian Komunikasi Korporat
Kementerian Wilayah Persekutuan
31 Januari 2020**